

Na kaminda pa Pais Kòrsou (4)

Hustisia

Edishon number 4 di nos página informativo ta trata hustisia. Gobièrnu ta informá paso a paso kiko el a negoshá i palabrá ku e otro partnernan den Reino enkuanto struktura estatal.

1. Riba kua parti di hustisia a negoshá ku nos partnernan den Reino?

Den e pakete di palabrashon tin 4 lei riba hustisia. Nan ta trata:

- Korte Komun di Hustisia
- Polis
- Ministerio Públiko
- Konseho pa mantenshon di lei

2. Kon bini hustisia a resultá den nos trayekto estatal?

Ora Kòrsou bira outónomo den Reino, Kòrsou mes mester kumpli ku derechonan humano, libertatnan fundamental i seguridat hurídiko, meskos ku Antia ta hasi awor. Kòrsou ke kumpli debidamente ku e responsabilidat ei. P'esei Kòrsou a negoshá riba hustisia pa traha huntu ku nos partnernan den Reino riba sierto área di hustisia.

Reino Hulandes tambe ke ta sigur ku Pais Kòrsou por karga e responsabilidat riba e terenonan akí, meskos ku Antia ta hasi awor. Pasobra segun artíkulo 43 di Statüt, Reino Hulandes ta garantisá nos seguridat hurídiko, libertatnan i derechonan humano.

3. Kòrsou mes no tin hende ku por karga e responsabilidatnan ei?

Sigur ku sí. Kòrsou tin hende ku por karga tur responsabilidat. No ta kestion di kalidat, sino kestion di kantidat di hende. Otro islanan den Karibe tambe ta traha huntu riba tereno di hustisia, maske nan ta independiente i algun di nan ta hopi mas grandi ku Kòrsou.

4. Kiko a palabrá riba Korte Komun di Hustisia?

Nada no ta kambia den e manera ku Korte Komun di Hustisia a funshoná te awor. For di tempu Aruba a bira pais outónomo den Reino (Status Aparte), tin un Korte Komun di Hustisia pa Antia i Aruba. E ta un korte di apelashon. E ta husga sentensianan di e kortenan di promé instansia na Antia i Aruba. E mesun Korte ei lo sigui hasi su trabou. Pero Antia ta stòp di eksistí. E ora ei e korte ta sigui hasi su trabou pa Kòrsou, Sint Maarten, Aruba i e islanan BES (Boneiru, St. Eustatius i Saba). E úniko nobedat ta ku e korte ta bai haña su mes instansia independiente pa atendé su maneho diario. Esei tabata un deseo di tur tempu di nos propio Korte.

5. Pakiko BES no ta kai bou di korte di Hulanda? Ata nan ta bira parti di Hulanda?

E islanan BES ta bira parti di Hulanda, pero nan ta keda ku e bukinan di lei di Antia. Nos legislashon ta komparabel. Ademas semper Korte di Hustisia a funshoná bon pa e islanan di Antia i Aruba. No tin motibu pa kambia esei.

6. Kiko a palabrá riba tereno di polis?

Kòrsou ta haña su mes kuerpo di polis. E ta bira un kuerpo kompleto i profeshonal ku ta atendé tur tarea e mes: for di e tareanan di mas simpel te

ku krimen organisá na nivel internashonal. Nos kuerpo di polis lo kai bou di responsabilidat di nos mes minister di hustisia.

7. No ta bini un kuerpo di polis komun?

Nò. Kòrsou ta haña su mes kuerpo. No ta bini un kuerpo di polis komun. Meskos ku tin na otro partinan di mundu, lo bini un fasilidat polisial komun sí. Esei ta un palabrashon entre e partnernan den Reino pa duna otro asistensia polisial kaminda ta deseá. Por ehèmpel, si un kuerpo polisial no tin e teknologia nesario pa por investigá un kaso, e por fia spesialistanan for di un otro kuerpo polisial. E kuerpo polisial ku duna asistensia, ta kobra pa esei. Kòrsou mes ta disidí si e ta pidi asistensia. Ke men, no por imponé asistensia riba kuerpo di polis di Kòrsou. E asistensia ta tuma lugá bou di mando di nos mes hefe di polis.

8. Kòrsou a entregá riba tereno di polis?

Nò. Al kontrario. Promé Hulanda tabata ke pa bini ún kuerpo polisial pa tur e islanan. Pero Kòrsou a logra ku nos ta haña nos propio kuerpo polisial bou di responsabilidat di nos mes minister di hustisia i bou di mando di nos mes hefe di polis.

Despues Hulanda a proponé pa krea un kuerpo adishonal ku lo a hasi kasonan mas kompliká. Pero Kòrsou a logra ku no ta bini niun kuerpo banda di nos kuerpo. E kuerpo di polis di Kòrsou mes ta responsabel pa tur tarea i nos polisnan por yega na tur rango.

9. Kiko a palabrá riba ministerio públiko?

Ta trata esei den e siguiente página informativo.

10. Kiko ta Konseho pa mantenshon di lei?

Esaki ta un konseho di ekspertonan independiente ku ta vigilá tur parti di e kadena hudisial riba nan kalidat i efisiensia, ku eksepsion di Korte di Hustisia. Por ehèmpel e ta mira kon prison òf rehabilitashon sosial ('reclassering') ta funshoná. Tambe e ta vigilá e koperashon entre e partnernan den Reino riba tereno di hustisia, i e ta atendé eventual keho. Dependiendo di kada kaso, e ta informá i konsehá e minister responsabel.

E Konseho ta formá pa Kòrsou, Sint Maarten i Hulanda (na nòmber di e islanan BES, ku ta Boneiru, Sint Eustatius i Saba).

E siguiente página informativo ta trata ministerio públiko.



Bo ke un enkuentro informativo den bo bario òf pa bo grupo?
Yama 4633225 pa un sita.